

四庫全書

集部

欽定四庫全書

文苑英華卷五百七十九

宋 李昉等 編

讓起復

為建昌王辭奪禮表一首

讓起復表五首

讓揚州長史起復表三首

讓起復除黃門侍郎表三首

讓奪禮表三首

為李給事讓起復尚書左丞兼御史大夫等表六

首

為李懷光讓起復表二首

為商州吳仲孺中丞讓起復表一首

為建昌王辭奪禮表

李 嶠

臣攸寧言伏奉恩制起臣為春官尚書曲降芝泥俯收
草土承命哀震叩心號絕臣攸寧誠惶誠恐頓首頓首
死罪死罪誠孝莫紀咎殃所鍾過隙永辭倚閭奚望不
自灰滅偷視光陰尚何心靈得齒人類陛下愛結敦叙
慈深宴逸免之苦塊錫以衣簪葭莩之恩飲澤誠厚荼

蓼之戚胡顏以寬况天地同節宗伯是經尊卑共儀達
喪有典使臣外掌邦禮內虧庭訓何以奉宣名教克弭
訛謗臣之愚蒙夙夜揆鑒平居疇日廢職曠官况識亂
匪莪情荒植栢寧可儀刑八座損益萬幾虛玷玄猷上
穢清鑒伏冀哀其窮懇惠以至德用伸犬馬之願獲遂
烏鳥之情則地義所弘彌文於永錫人倫所詠實光於
孝理無任荒迫之至謹奉表陳請以聞臣攸寧誠惶誠
恐頓首頓首

此篇原在五百八十一卷中今移此

讓起復表

張九齡

草土臣九齡言伏奉去年十二月十四日制書復臣中書侍郎同平章事者外沮公望內奪私情餘生力微哀怖殞絕臣某誠哀誠懼死罪死罪伏以宰臣集作相所職

贊理庶事陶冶太和以遂萬物苟非所任有受其殃臣實單人本無大用况在艱疚觸緒哀迷矧以素所不堪加之荒塞而軍國事重翼亮誠難臣獨何人謬居此地

退省所有負敗將及雖願感恩扶力匍匐祇命其如塵
玷聖鑒汚辱台衡於國非急於禮虛廢臣比年限役多
闕晨昏疾疹之際遽乖救藥凶諱之日遠隔追攀而星
霜未周冠纓載迫是以庭闈昔絕几筵今阻凡曰名教
實所深哀伏惟睿情有以永錫况質言非讓悲歎不文
祈天之心惟聖所體實冀哀素有次喪紀獲終俯察荒
迷乞遂情禮臣無任感絕哀迫之至謹詣朝堂奉表陳
乞以聞臣誠哀誠懼頓首頓首死罪死罪謹言

開元二
十二年

正月二十七日

同前

王 鉞

草土臣鉞言伏奉制書復臣御史中丞餘並如故恭承
睿獎五情震越臣中謝臣弱喪所生不能自立慈親撫育
得以成人所恨終身號慕無及今纔踰卒哭寧冀生全
聖澤曲流天光特照記臣於苦凶之下起臣於風憲之
前知臣轉深萬死難謝誓將糜粉上答殊私豈固禮經
輒稽嚴命但臣自丁艱疚日漸尪羸竊料形體未堪驅

策徒招謗議無振紀綱伏乞聖恩捨憐俯矜覲冒容臣
歲月抱釁私門稍能支持不敢辭訴無任感懼荒迫之
至謹詣朝堂路左奉表陳乞以聞

第二表

前人

草土臣鉞言臣迫以私情銜血上訴曲垂聖禮敦喻彌
深恩重難移心孤易殞哀榮之極肝腦何酬中謝臣伏在
糞土之中苟偷朝夕之命殊私荐及特蒙收獎授以風
憲委以澄清臣雖至愚豈不知天慈所屬使臣即蹈湯

火若登雲霄安敢固辭輒拘常限但緣荒瘵忽忝衣冠
自審殘生必招官謗謹冒死重請不勝戰越無任哀懇
荷戴之至謹詣朝堂路左奉表陳乞以聞

同前

蘇頌

草土臣某言伏奉恩制授臣銀青光祿大夫起復行尚
書工部侍郎勲封如故制書俯臨荒怖殞絕臣某中謝私
門不造殃罰所鍾遂延先臣永辭聖代陛下飾終念舊
事光前典臣孝誠微薄不自滅身幸忝大臣之胤假存

主祀追惟慈父之恩不可復得痛殷創鉅豈冀生全臣
心欲言言不忍喻陛下孝理天下俊又在官恤臣遺孤
加臣寵命非臣舉族少能謝天誠以吉凶典禮朝廷大
政喪親執喪人倫為極使臣廢禮於心極冒榮於喪紀
虧荼過甚將焉用之况其不任孰可陳力抱釁窮懇理
殊他人匪直悲深名教實亦感增存沒燁燁昧死罔知
所裁伏乞聖恩垂寢嚴命無任荒迫之至謹詣朝堂路
左奉表陳乞以聞

同前

庫狄履溫

草土臣履溫言臣行迕神明禍歸先父日月未幾苴麻未變伏奉恩敕授臣駕部員外郎充朔方軍判官詔書臨門匍匐廬次捧跪驚駭號纏痛絕氣殘毀容臣今隕越伏以滅性非教逃天莫由敢祈孝治少察哀訴中謝臣門緒單賤本無兄弟惟臣一人鞠育鍾愛幼在隴畝輟臣讀書家貧本無僕役柴水為資一作弊臣在師氏父常有勞束修資費母亦勤績訓誨之漸明時忝官唯資

以榮過此無報豈謂祿養纔及歿釁已深所侍老母風

氣仍積每臣崩摧撫對增病臣稍用割哀就

一作禮

問

哭承顏若乃

一作臣若

暫離母亦難保且祠祀無主几筵何

依臣之憂酷特為尤甚逮及秋季始至小祥苫廬尚新

墳土猶濕聖情何忍令其輟情顧惟形骸實汚冠冕臣

又近染風疾似因哀瘵語事便忘居常輒驚以此從戎

必不堪命伏乞憫臣艱疾察臣孤獨卒臣喪服矜臣母

老則生人之本盡於哀敬國家淳風載激流俗無任荒

懇

讓揚州長史起復表

李朝隱

草土臣某言奉親無狀禍降私門窮衰殘喘不自殞滅
朝夕苦塊纔經半年伏奉四月十八日敕書俯奪情制
授臣揚州長史荒情震怖悼心失圖臣某中謝臣險釁不
減才術無紀往因叨遇頻升榮秩猥忝青紫罕裨塵露
今乃寄以維揚位超列岳非常睿渥忽霑朽瘵尚敢冒
哀陳歎實以私志未終且臣亡母在猶蒙曲澤憫其羸

老抱疾不任隨臣之官有命自天數令歸覲受恩未幾
此禍俄鍾上既不盡天慈下則末由就養今復號哭無
位奠酌莫親有倍哀情重增摧苦况臣之在疚尚未小
祥遽此復官殆無其例臣今扶力自曳哀惶詣闕伏乞
賜停權奪許以終哀則微命偷生終期報國倚廬過隙
少答允懷無任窮懇之至

第二表

前人

草土臣某言臣在艱疚遽蒙榮獎曳體陳歎冀遂荒誠

天貺網繆未蒙哀

一作允

許進退狼狽悲惶殞絕臣某中謝

今臣窮噎豈暇多喻所不殫

一作憚

言敢以陳冒臣自少

不幸先臣早世亡母養訓謹能成立昔處微秩甘旨

不充及忝大官臣親已老從官或遠不任扶輿十數年

來每違左右以臣長子常恨不見積此憂憶遂成沉痼

是臣不孝莫慰母心追惟及此五臟隨裂且母尚憶臣

以成病臣豈可變縗以就榮新穀未升便起如故則臣

何力以負斯咎何心以忍此痛何庸以承孝理何面以

對吏人又臣先患風緩頃加心疾觸事迷錯鮮能行步
臣平日無釁猶不如人今疴疾轉侵朝不慮夕仍令處
事恐辱所委徒紊藩條必不勝任以是冒昧不測仰天
重請望輟前恩以全餘息忽不聽臣血淚俱盡死亡無
日無任荒迫之至

第三表

前人

草土臣某言昨再犯宸嚴亟陳哀懇荒辭謬理不足感
天恩貺如初又令斷表臣知萬死豈合觸冒誓畢窮命

更披肝血匍匐下迷悚懼失據逼迫碎首不知所陳中謝
臣旣自傷早孤墳塋未立母因臣成疾以至於亡殺身
何瘳昊天罔極母終日近遷祔猶闕臣病危殘懼不克
葬故欲偷生忍死冀遂本情服勤墓側以畢封樹不謂
殊私忽降委臣藩岳累有懇誠天恩未許事君違命罪
在殊刑喪親靡終期不覆載去就無屆幽明受責雖大
和所容而莫知所擇且臣先患風緩今已積年往年任
大理卿於朝堂悶倒困殆良久朝臣共見自爾已來數

數發動及丁艱酷此疹彌加每常一發累日

一作月

不起

心緒煩迷若喪若失更令處劇形必不支寔穿闕營葬
則倍苦心形俱極死可立至若不具陳實理便成欺罔
聖恩送終莫從郡務不舉無益於國兩罪何逃殘氣泯
焉誰執其咎特望哀其巨痛救其將死知臣無他直以
衰病惜臣微喘使延晷刻嚴命少輟情禮得終非臣最
爾所能上答臣今哀辭窮極莫可告訴皇天后土實鑒
臣心前後所上無非至切敢有片言假託詭露虛妄天

地鬼神當共夷滅臣身以謝陛下恩遇之重魂爽震越
不知所忌無任懇苦之至

讓起復除黃門侍郎表

張說

草土臣說言臣私門凶咎喪紀未終不自毀滅苟存聖
代忽降制書復臣工部侍郎尋奉後命授臣黃門侍郎

震駭

集作
驚

失圖哀怖殞絕臣說誠惶誠恐頓首頓首死

罪死罪臣弱年早孤母氏訓立得紹基構忝列簪裾從

官歷年晨昏多闕播遷遠裔離別又

一作
久

苦顧復無答

報養何追心所推感語不能喻甫至冬中禮及祥禫今
已春暮瞻言幾何是臣事朝廷日長戀几筵日短乞寢
嚴命許達私情訴衷祈天所望矜遂無任荒迫之至謹
詣朝堂路左奉表乞哀以聞謹言

此篇六百一卷重出今已削去

第二表

前人集
無

草土臣說言臣在疚承榮布

闕

精誠無感天睠未

迴假喘殘生悲懼轉集臣說誠惶誠恐頓首頓首死罪

死罪臣聞苦者不覺聲哀窮者

闕

情有至切辭

無敢隱臣為少子慈愛所鍾每一離別輒加憂憫况臣
生年多故違隔私庭終堂之日身限公事存既數違左
右沒復不畢几筵痛心自傷特殊人類臣今望延數月
企及再期乞恩無多報國非晚冒死重請冀蒙哀遂無
任懇迫之至謹詣朝堂路左奉表陳乞以聞

第三表

前

人集
無

草土臣說言臣荒喘窮情再躓疏宸

宸一作聰懇誠不到未

感天心誓將冒死祈恩分外中謝臣本書生門非代祿數
葉單緒族無親房臣父遭憂曾祖未葬臣有兩兄一妹
甥姪九人又有中表相依尚成百口吉凶衣食待臣以
辦臣今拜職一作職忝黃閣侍奉丹墀厚祿清班一朝改官

舉宗榮賴為幸過甚人情所欲豈合稽恩正以熒熒苦
心有所未盡臣亡母在日朝夕誠臣以臣獨立無徒好
直多忤知子者母果驗所一作此言往罹大獄竄命炎海

晨出晚歸貽慮非一况涉危難傷心載途追計生平倍

增推慕侍養日少違離日多即一作臣母憂臣以終身

臣其忍服練以從事情既不同常例望在特降殊恩一作

私臣先患風緩近加虛痺陛下倘從臣數月容過再暮

非但寬其哀疚固亦全其生理亡身報國庶竭後圖木

植一作有性枉之則折人願在心違之則苦雖強一作

為用將何以堪銜泣仰天冀蒙哀允無任懇迫之至謹

詣朝堂路左奉表陳乞以聞

此篇六百一卷重出今已削去注異同為一作

讓奪禮表

吳兢

草土臣兢言伏奉去年八月十

後篇作
八字

日恩敕追臣赴

京起復尚書水部郎中依舊兼判刑部郎中知國史事

聞命驚號心手無措臣兢中謝臣行負幽明禍延所怙

一作

恃銜哀茹血五情崩潰卜鄰之訓永慕不追陟謁之感

窮寃已及但心同木石未能自死豈悟

後篇作謂
或作意

皇明

旋加辟命且臣聞在家稱孝居國必忠苟違斯理實虧
禮教焉有躬嬰荼毒而跡忝南史首伏苦廬而名叨東

觀將何以發揮帝典褒貶人倫定一代之是非為百王之準的臣不敢遠喻前古廣飾浮辭自近歲以來起復者則有御史大夫解琬黃門侍郎張說工部侍郎蘇頲皆訴哀陳歎特蒙矜遂此實成例竊敢庶幾伏願陛下敦孝理之風全逆喪之典追收綸渙俯納懇誠許其畢疚私庭終服凶次獲申負土之禮用展攀柩之悲則雖死之年猶生之日無任荒迫之至謹遣臣太學生終奉表陳乞以聞

此篇五百八十一卷重出今已削去

第二表

前人

草土臣兢言頻表乞哀誠辭已罄未蒙矜亮獎喻彌切
鞠躬周章倍增號震臣聞自昔墨線本因兵革權宜變
禮不為文儒後來浮薄罕存喪紀事匪軍容亦從權奪
陛下休明撫運景業惟新伏望革近代之澆漓復先王
之至德況史官之任為代準的若苟虧情禮輒徇恩榮
覲目強顏操簡書事適足玷聖朝之孝理何以樹終古

之風聲特乞天慈少加矜察使畢情苦塊少申悲露則
天地之恩實為至厚臣子之道幸此克全無任懇迫之
至謹詣朝堂路左奉表乞哀以聞

第三表

前人

草土臣競言臣去九月一日冒死哀訴冀得終服私門
天睠猶邈未垂哀察跼影窮號罔知自寘又奉十一月
二日敕史館要才須從權奪宜令州縣敦諭發遣者伏
對崩號觸緒屠裂臣某中謝臣孝虧誠感奄遘閔凶瀝膽

銜荼崩心茹棘屺骸殘喘豈冀生全天澤曲私屢加奪
命令居史閣是掌記言臣昔忝此官十有餘載才輕寄
重答效無施未能褒貶有章使人倫知勸典謨大訓與
日月俱懸即微臣平日其曠職如此今心形隕越荒疾
失圖寧可重處南董之司頻叨班馬之列實貽貪祿之
咎更招廢禮之辜顧視等夷何施面目且三年之制貴
賤同遵四時之悲几筵是托乞歸身苦壤趨侍松塋既
不負素心亦不玷皇化干黷已屢伏待刑書無任崩迫

之至謹詣朝堂路左奉表乞哀以聞

為李給事讓起復尚書左丞兼御史大夫第二

表

獨孤及

草土臣某言臣昨以哀瘵愚懇昧死上陳冀回日月之
光曲成螻蟻之命

集作
志

伏奉丁酉詔報未蒙矜允捧讀

聖旨五情殞絕中謝臣伏以適四方宣王命之任必擇職
位素高聞望炳著學能專對有餘力者以充其選臣以
宗室末屬妄荷寵命

集作
惟

才與知俱不如人況今衰

羸殘喘加以病苦支離沉瘵歷夏及秋終日不過一食
不杖不能自起自料若力疾祇命適數千里雖欲自強
必中道委頓集作詔旨廢失是憂臣伏見廣德二年七

月赦書罷天下起復之官集作俾

詐

終喪禮此陛下孝德

過於雨露

集作
兩漢

然渙汗之發率土霑濡

集作
霑

豈獨令臣

隔在赦外又尚書右丞會府之樞轄御史大夫天下之

準繩宣慰巡撫朝廷之大寄今臣授此三職而以起復

為名因臣過舉破陛下德

集作
法

今使百寮師師何以取

則臣夙遭不造備生人之艱官始一命先臣棄背養母

鞠育至於

一作于

成立遭罹二京覆沒弟以宗室見害臣

惻然茹痛獨侍板輿備嘗險阻莫及榮養纔擢掖垣慈

顏違代罔極之痛終天莫追今靈筵未塵墳土尚濕遽

命

集作令

臣荷金印之寵處皇華之榮使總帷廓然奠祭

無王此恒情之所不忍也陛下其忍之乎伏乞聖慈曲

臨皇明下照矜臣哀

集作起

瘵察臣不逮更擇時彥授之

使職許臣得以羸骸終其喪紀實天地之施鍾於臣身

倘殘魂不集作未滅集作朽賤集作質用委哲當摩頂至踵以答

聖造臣無任哀瘵懇迫之至

第三表

前人

草土臣某言再以微誠伏問請命綸言累降天聽未回
仰戴聖情俯循哀感悲懼交迫悼心失圖臣某中謝臣才
能不及中人且未嘗有毫髮勲效陛下不以臣不肖特
降殊私授以驅馳之任賜以親賢之目臣宜匍匐奉詔
戮力將命寧敢矯禮為名以讓自飾顧臣羸瘵奄奄行

步支離力有所不任用有所不逮風憲重任也宣撫大

典也誠恐以疾墜天

集作王

命隳使職員陛下所舉以重

臣之罪方今濟濟多士盈於朝列陛下捨而不

集作勿

而拔臣於苦廬之中必以臣守職

集作智職

為小有可採臣

之他日猶不如人况今尫劣餘息方寸紊矣焉能為陛

下震揚休命覽觀風俗躬自惟忖知不勝任是以拳然

丹誠猶冀識察陛下仁聖孝德錫類海內豈令善貸不

沾臣身敢冀

集作希

殊造俯遂微懇則死之日生之年也

臣無任哀懼之至

第四表

前人

臣某言一昨臣以哀瘵叩奉恩私封章三上不蒙矜允
猥以羸薊之質謬銜出疆之命賴陛下威靈免貽咎責

復得待罪朝庭

集作闕

拜首

集作許

几筵仰荷天恩

集作慈

俯

慙靈祐臣中謝頃陛下不以臣鴛蹇特加寵渥者豈非知

臣屬忝宗盟曾奉使河朔謂能闡揚天旨懷柔遠方而
尚書省材賢如林庶政必舉陛下垂拱羣臣守職固不

假臣以區區之力重尸省闡明矣今將命既復本職未
解敢恃皇眷輒復陳乞臣莞然在疚獨無兄弟荼毒日

淺創鉅痛甚且又疾

集作瘵

病四體支離重寄榮遇人之

所欲力有不任豈敢虛受此臣所由拳拳不已有望於
陛下也臣伏以三年之喪未足申罔極之恩先王制禮

以節人情臣本喪未及

集作踰

一年奉使已歷三月若直

假國家名器食陛下祿俸是臣亡母於臣有終身之愛
而臣於亡母無數月之報先聖以孝感為號陛下以孝

德格天錫類之恩宜及海內今寵命一降使臣有不孝

之日子而不孝臣亦

集作如臣

不忠不孝不忠人所當棄豈

足為陛下操持綱轄彌綸憲章臣之頑固猶知不可况

天下僉論朝廷與

集作公

議乎伏願許臣免官遂臣私志

儻終喪紀尚有餘息誓當摩頂粉骨以答殊私臣無

任

第五表

前人

臣某言臣去十一月某日又詣銀臺門上表陳乞

集作情

至今積旬未奉恩旨屏營無地哀惶疚心臣某中謝臣蕞
爾朽質叨奉明恩違天固辭豈不知罪實由恃陛下蒸
蒸之德故敢守臣子區區之意伏以忠孝之道禮生於
情資親事君愛敬同等臣生處聖代齒力未衰致身日
長効節途遠獨慈親違棄永往莫追先王制禮居喪之
紀有限昊天不弔欲報之德罔極而含哀茹痛緘哀日
月九字集作而恃集作寵干貴雖欲僂俛從事使臣何
今茹痛緘哀以為心蓋三年之喪金草無避自魯公伯禽晉襄公始

也實以徐戎秦師之役有為為之非是則否故孔子對
子夏問曰以三年之喪從利者吾不知也今朝無徐秦
之難臣非金革之任竊陛下名器是從利於喪也食稻
衣錦之責捨臣誰歸凡曲全萬物使不失情集作性天地
之仁也鞠育姬煦知寒熱疾痛父母之慈也兼仁慈集作
二而有之明君之惠也臣是以又持悃歎昧死上言竊
希天父之恩不奪臣子之志泣血待罪惟陛下省察無

任

第六表

前人

臣頃頓首昧死詣闕累陳情狀肝膽悉已披露懇誠冀蒙識察于今浹辰德音不下實由臣辭淺意陋無以動天哀惶失圖跼蹐無地臣某中謝臣雖親忝葭莩才實駑

鈍位忽過重

集作量

恩亦加等宜竭筋力仰酌造化豈敢

飾讓自言企禮顧望嘗聞上有至仁之君則下無失性

之臣

一作人

陛下以蒸蒸聖德格于上下故臣以哀哀孝

思敢辭寵榮

一作榮祿

陛下豈忍抑其微誠假令臣損情變

禮陳力就列亦猶雙鳧乘鴈何補江海况敢貪不次之
寵遺罔極之報因喪從利以哀為榮此臣所以屢躓天
威望廻卑集作宸聽懇懇至願形於累表拳然待命惟聖
慈察之臣無任

第七謝免起復表

前

人見集本

臣某言伏奉某月日批敕矜臣荒涼之情許以殘喘終
喪使奉几筵獲展哀報陛下誕敷五教惇叙九族以臣
屬忝枝葉哀纏蓼莪故恤以皇慈使及於禮天地之意

曲全人欲日月迴照下及苦廬伏讀詔書感懼交集仰戴聖造若蚊負山屏營瞻奉惶恐隕越臣無任哀戴之至

為李懷光讓起復表

按舊唐書李懷光以大曆十三年起復獨孤及

神道碑大曆十二年卒今英華以此二表為及所作而本集亦無之疑誤隨前人名

氏

草土臣某言伏奉某月日制書起復授臣某官兼某使捧對恩命哀號失圖微臣夙遭凶釁幼集荼毒亡母鞠

育驟歷暄寒三十年間勤勞備至俾臣習武教臣觀書
丁寧懇切僅至成立自逢昌厯累辱驅馳待罪朝行或
申微效皆母之訓以及於斯凡在輩列莫不知委而久
從王事靡有定居晨昏屢違甘旨多缺則臣之於母所
負實深叩地呼天萬恨何極伏願察臣哀迫許臣終喪
少申子道無乖企及無任迷謬崩迫之至

第二表

草土臣某言一昨具陳哀懇冀蒙諒察旋奉墨制有阻

微誠精魄震蕩五內分裂中謝臣為學至淺昧於禮經今
冒死上聞實私情懇迫臣年未弱冠即罹閔凶終鮮兄
弟惟臣與母零丁孤苦繼以窶貧衣食所資悉資紡績
比臣從戎朔漠漸列軍行適遇艱難累經戰陣北出恒
趙西趨鳳翔或往鄴下或留河上臣母別臣積憂成疾
禪誦之外涕泣終日形貌支離殆於骨立及兩京既復
九方攸同臣在邠寧粗申力養豈謂無狀速禍殃罰所
鍾深辜顧復之恩永負劬勞之報興言及此摧心痛骨

則臣母於臣異於常母臣之於母不逮常人誠合服縗廬墓以終餘齒豈可忘哀狗祿所務從權此則天地不容名教所棄伏乞納臣窮歎矜臣血誠俯遂愚衷許終喪紀倘殘生未泯子道獲全必當竭力他年以答玄造雖復殞身鋒鏑死且無恨無任荒迫之至

為商州吳仲孺中丞讓起復表 于 邵

草土臣某言一昨瀝血上聞乞停新命聖情未察鄙志莫申捧對天書載崩載殞臣某中謝臣聞忠孝同道君親

一致為子能孝為臣能忠苟或易茲固無所取臣幼多
疹疾氣柔形羸臣父閔臣疴瘵特所鍾念一飯一藥皆
自躬親十有餘年方至成立及臣委身戎幕効職塞垣
頻歲驅馳頗乖視膳自授任中丞漸列班行始遂晨昏
獲申祿養豈謂星霜未幾殃釁遽鍾拊心擗踊萬恨無
及倘遂臣請得終禮制其於子道所負猶深如或遠別
几筵苟從職事此則禽獸不若名教所無於家尚然於
國何有况聖恩一昨用臣之意本為子儀奏聞當以蕃

寇憑陵遠慮河中危逼謂臣舊將素習兵謀遂用起臣
使當金革危難之日事或從權今郊壘無虞妖氛殘滅
以臣苴經更齒衣冠自顧形骸實慚面目伏祈立造許
以終喪殘喘餘魂死將不朽無任迷謬崩迫之至

文苑英華卷五百七十九

欽定四庫全書

文苑英華卷五百八十

宋 李昉等 編

辭官一

辭官表二卷英華所編
失年代先後今正之

為金吾將軍陳令英請免官表一首

為宗監請停政事表一首

為王起避諱辭澧陽縣令表一首

為定王請降王位表二首

太陽虧為宰臣乞退表一首

辭官歸滑州表一首

為董江夏乞退表一首

代于京兆請停官侍親表一首

為金吾將軍陳令英請免官表

武后

陳子昂

臣某頓首死罪死罪上言臣聞軍政不臧春秋責帥故揚干之亂魏絳致戮所以國有明賞下無濫功臣實

集作

以幸常才文武兼闕始年

類表作
年始

十八投筆從戎

類表作
戎行

西踰流沙東絕滄海南征北伐無所不至藉集作席寵門

緒忝迹軒墀屬高宗崇德深仁孝理天下八字類表作經仁義理

天以臣父子集作祖父兄弟一門五人皆仗節盡忠身死王

事遂超臣不次授原州都督臣時行年始四集作三十二

職兼五印寵集作榮絕一時階緣此恩累忝藩翰持節統

郡集作部前後八州皆居塞垣當賊衝要國之重寄莫與

為集作臣比臣雖無長策恤戎伏胡然恭守朝章保完免

失又屬陛下大聖矜老容愚不以臣駑怯更加寵命授

以青紫遣督幽州林胡構凶王師出討士馬雲集軍務

星繁糧饋戎

集作戈

甲以萬

集作動

億計臣無田疇鄉導之

策又乏杜預度支之才空竭疲駑

一作單

晝夜不息以勤

補拙首尾

二集作三

年彌縫闕漏幸無憊乏張玄遇等不

謹師律賊得乘機遂敢長驅燕陸深入趙地

集作際

臣又

無李牧東胡之畧實愧吳起西河之守使凶狡攘奪

集作

效

遂擾邊毗論之國憲合劓頸謝罪陛下不以臣之

集作

為辜更授清邊軍副大總管五月恩制六月到軍

一作邊

逆虜天亡臣又無效至於軍功戰籍叙勲定勞副職日

淺未及精覈

一作覆

大兵旋旆王師獻功而漢廷將軍未

聞辭第雲中太守已論增級今乃竊功謬賞有異

集作塞

朝章忠誠殉節不昭

類表作明

國議

一作憲

而臣由濫其職任

過其才實

類表作皆由臣身濫其職任過其才

上不能允副聖心中不能

匡正戎律傍招物議有紊

一作失

軍容臣罪何逃誰執其

咎伏願乞賜骸骨貶歸私第式清朝序永覩師貞不勝

待罪惶懼之至

為宗監請停政事表

武后

崔

融

神功元年

臣楚客言臣聞古之聖君慎擇賢佐故軒轅得力牧而為五帝先夏后得咎繇而為三王祖殷之盛也伊尹格于皇天姬之隆也虢叔聞于上帝斯皆應風雲之會依日月之光社稷繫以興衰時政由其輕重粵若大周之有國也天策金輪聖神皇帝提封千里先宅四天道化淳釀神功靜默雖堯年無事久聞童子之謠而漢家用人或取匈奴之笑臣某中謝臣疲駭強策卒無行地之功

決羽曾飛終罕冲天之望今臣經術淺短才能朴畧言
不足以補世行不足以勵時徒以枝葉微姻葭莩末屬
遂得拔擢泥滓騫翥雲霄食君厚祿不能有所輸報受
君殊寵不能有所發明茫然政途妨此賢路外慙衆口
內愧諸心朝廷亦何異捨陸而泛舟膠柱而調瑟當域
中之有道豈天下之無人常深鼎覆之憂每切鼓妖之
懼臣之懇懇非欲自保其身臣之區區切慮上塵於國
今者契丹大勦默啜自來六合大同四方向化加以朔

旦冬至鼎命惟新五星若連珠二曜如合璧謂宜退不
肖進賢良與天同休與人更始又聞管夷吾有言曰德
義未明於朝而使居尊位者則勞臣不勸也功力未見
於國而令處重祿者則勞臣不勸也臣有何德而居之
臣有何功而處之臣雖至愚敢忘先誡伏乞陛下察匹
夫之志思仲父之言坦至公之方弘減私之道羊叔子
之辭開府臣事君以忠庾元規之讓中書君使臣以禮
博求于衆廣聽于人停臣檢校夏官輟臣平章政事臣

得避位清切待罪尚方罄竭丹誠庶幾或濟伏惟陛下
容納纖陋鑒揆愚蒙使周勃無汰背之慙虞丘有退身
之地則雖死之日猶生之年矣無任悃欵屏營之至謹
詣闕奉表陳情以聞云云

為王起避諱辭灃陽縣令表 前 人

臣某言臣伏奉恩旨授臣灃陽縣令臣才疎藝薄植此
無庸命偶時來邁茲多幸逢上聖之初刼叅太平之末
位槐檀驟徙亟遊銓館之門草芥何為忽枉樞薪之綬

召見於赤墀之下垂恩於紫霄之上豈徒任好之魄忽
上於鈞天固亦闕澤之名遂昇於飛日仰殊私而載惕
顧匪服而增慙雖剗跡都畿永無闕庭之望然委心蓬
艾長懷雨露之仁幸欣就日之明敢憚乘流之遠但以
州縣之號與臣亡父諱同迫切私情不獲遙赴伏乞天
慈永錫聖造曲成弘以孝理之風愍其心瞿之日使得
策名他職陳力異邦則地義天經實獎於名教靡軀粉
骨豈酌於鴻恩一作恩造無任懇迫之至謹昧死陳表以聞

為定王武攸暨請降王位表

中宗

宋之問

臣攸暨言臣聞力微任重無德者履之必危功薄賞隆
有識者陋其非據臣地因外戚器實中庸顧慙蓬艾之
姿謬忝葭莩之末則天大聖皇后敦睦九族崇念六姻
曲申猶子之情爰垂降主之澤禮優築館恩洽錫珪拔
自堂姪之流光以親王之位臣嘗再瀝誠懇集作已蒙
賜等諸昆今陛下隆德嗣興鴻基紹復羣萬物而改旦

宅千齡而配永洛識河圖允叶純深之義雲行雨施載
流寬大之恩追奉先慈將軍後命外家諸子降等猶誓
於山河主第增榮在臣更超於等數陛下雖渭陽情重
沁水恩多凡是封冊王公終亦集作憲章堯舜以濯龍

之戚今乃方於五侯緣駙馬之姻古未封於四履私親
越禮聖人之孝理載光冒寵延災微臣之官謗斯久又
以班叅禁內秩比侍中自非德邁應璩識倖慶忌將何
以對揚顧問規獻文章况臣位以恩升寵非才進無脛

而至凡姿筮於珠玉無翼而飛睿澤借其毛羽未貽身
譴幸庇容光臣亡兄攸寧循榮增懼以臣叨鳧繹之貴
日夕魂兢負鼇抃之恩歲時力盡屬續之夕再受懇言
憂臣愚蒙令臣退讓倘陛下俯遂勤請照集作察冥心

納臣揆分之言寘臣獲全之地去茲王號降以公名爰

食封邑同諸兄弟賜改散職即望參朝實冀家福惟新

朝典集作咸序天德更逾於造化神理不責於滿盈臣

無任懇欵覲懼之至

第二表

前人

臣聞富貴者易象謂之崇高滿盈者至人誠其顛覆臣

在非次久冒殊恩所以輟寢思危廢飡懷懼慊歎

集作嫌疑

之極載陳前表備瀝中誠之訴實非外飾之詞而聖鑒

未迴寵章仍舊戴岳之重何憚力疲阡原之隍日憂身

墜臣某中謝臣雖學慙敦史而塗聽前言尸位者必會短

期冒榮者難為長守豈有外戚尚主異姓封王男皆公

侯女食郡縣佩服五等輝耀一門湯沐山河家傳

集作喻

萬戶耕夫織婦凡有幾人役彼有勞之人供臣無億之

用

集作無德之費

縱蒙聖心再

集作垂

假其如神理不容自先后

臨朝攀榮已久聖皇纂極沐澤惟新自古迄今如臣流

輩苟進者速禍勇退者獲全且王者所以強幹弱枝為

藩佐

集作作

屏封必李氏無

闕

漢文

集作章

伏乞陛下降河

渚之姻感渭陽之族賜臣軀命永守蒸嘗得同昆季之

流望捨郡王之號臣以日為歲以榮為憂希迴三舍之

光允臣萬死之請無任覲冒之至

太陽虧為宰臣乞退表

中宗

蘇頌

臣某等言伏見今月朔旦太陽虧陛下啓輟朝之典有司尊伐社之義臣等伏自尋繹無任惴恐臣某中謝臣聞官或迷焉疑必犯先王之誅辰弗次舍必貽上公之責此乃邦有常刑聖有明訓頃者論道任重衮章猶缺端揆位隆鼎台是亞所以熙帝之載代天之工調六氣之和法三光之度則大化為本非小才所宜崇替率由咎徵斯屬伏惟應天神龍皇帝陛下光被四海對越二儀

人祇宅心俊賢翹首但置之左右以為輔弼自忠言啓
沃功臣保人用作霖雨格于皇天臣何人斯而敢叨擬
議臣等智能素薄經術殊陋望不過於掾史名不達於
州閭徒以遭逢盛明頗皆履歷叅廟堂之機密為宗族
之光寵者十數年于今矣忠肅恭懿遠謝八元之名進
善退惡近慙二君之美陳平有言嘗則不稱賈誦延誚
居然已得光陰久馳年禮俱逮自應屏黜以清彝序而
徘徊聖恩萬一希效僂俛殘歲甲子空多遂超總領之

司愈失具瞻之望將何以匡翼庶政儀刑師屬且視事而老才愧千秋之賢待罪安歸憂深萬石之裔久知塵穢寧虞負乘所以素飡加責聚誼於下薄蝕生災見昭於上天之所戒臣不可逃陛下矜而宥之未致于理伏乞收其印綬賜以骸骨則知胡廣罷位抑有前聞徐防免官復自茲始臣竊其幸物誰不宜懇到所祈惶怖交集無任切迫之至

辭官歸滑州表

李

邕
開元中

臣邕言臣素無藝能積負訕謗衆多之口自可銷金怨
讎之心每堪殞首伏惟陛下至明大聖察之纖微盛德
在人洗之瑕穢山川納者不擇薰蕕天地覆之是雷雨
露且久荷惠渥大抵官榮今臣蒙國恩私及驅軀疑作命

事出涯分之外恩加父母之深已逝之魂復歸朽質既
安之地尚忝高班雖欲殺身未能報主彌慙持祿有以
保名但秋燕將辭必徘徊於大廈老馬雖去終顧步於
華軒况臣今茲六十有七光陰荏苒行止一作敬危就

木之時不知幾日懸車之歲僅有三年即以今日歸州不任違遠涕戀之極謹奉表以聞

為董江夏乞退表

肅宗

元結

臣某言月日敕賜某官某乙至賜臣制書示臣云云者臣伏見詔旨感深驚懼臣豈草木不知天心頃者潼關失守皇輿不安四方之人無所繫命及永王承制出鎮荆南婦人童子忻奉王教意其然者人未離心臣謂此時可奮臣節王初見臣謂臣可任遂授臣江夏郡太守

近日王以寇盜侵迫摠兵東下傍牒郡縣皆言巡撫今
諸道節度以為王不奉詔兵臨郡縣疑王之議聞於朝
廷臣則王所授官有兵防禦隣郡並邑疑臣順王旬日
之間致身無地臣本受王之命為王奉詔王所授臣之
官為臣許國忠孝集作之分臣實未虧蒼黃之中死幾
無所不圖今日得達聖聰集作臣今集作年將六十老
母在堂縱未能奉義捐生則豈忍兩忘忠孝臣少以文
學為諸生所多中年至耳順逸在山澤聖明無事甘為

外臣無何以鄙僻之故返為人知遂汙官次以至今日
臣又頃年貶謫罪未昭洗今所授官復超越班秩罷歸
待罪是臣之分今陛下以王室艱難寄臣方面臣亦已
忘身許國並言於皇天伏惟陛下念臣懇至謹因敕使臣
某官奉表以聞

代于京兆請停官侍親表

代宗

獨孤及

臣某言臣聞審官而用者君上之明也量力而動者人
臣之義也然則審官先於責實量力在於知止苟違斯

道是必終凶臣以薄劣素空行藝遭逢際會累忝驅馳
自受京尹向逾周月上無報國安民之效下乏推賢審

己

類表作
進善

之能官謗日深內省知愧伏以去年冬末迄


于今日竊聽閭閻頗有流散在于京輦亦多攘奪臣兄
枉橫為賊所傷哀苦之中忍恥尤甚雖久令分捕而竟
未就擒臣之無能於茲可驗偷安重任夫亦胡顏况臣
同氣數人相次淪沒閨門之內哭不絕聲應由臣無德
而祿召此殃豐興言感慕痛骨摧心又臣老母素多羸

瘵近從數載頗益沉綿臣妻先亡無人侍側飲膳衣服
臣悉躬親頃任京兆少尹中間又司帑藏雖稱要劇亦
有餘閒臣每退朝便道暫視方藥自公言歸早見安否
老母以數在左右都忘呻吟及臣典領大府事繁務切
雞鳴而出暮夜方歸清晝之時莫見親面凡所服餌或
非調適心有未快類表疾亦轉侵在臣焦灼類表啓處
作愜無地專力養則有妨吏職徇公事則闕奉慈顏忠孝兩
虧紀綱將廢以天倫哀緒未平之日憂老母方寸已亂

之時雖欲自強必不勝任倘漸荒府政小紊朝經

類表
作章

他日噬臍固將何及或當重責已負前恩是敢泣血祈
天瀝肝請命特乞免臣所職就養私門非惟有光孝理
實亦少裨玄化龜蛇賤類上報何階烏鳥微情反哺斯
足無任懇願迫切之至謹詣右銀臺門奉表陳乞以聞
誠惶誠恐頓首頓首



文苑英華卷五百八十

欽定四庫全書

集部

文苑英華卷五百八十一

詳校官給事中_臣李臺

助教_臣常循覆勘

總校官進士_臣朱鈞

校對官中書_臣胡紹基

謄錄監生_臣熊夢祖

欽定四庫全書

文苑英華卷五百八十一

宋 李昉等 編

辭官二

為楊相求退表一首

河東副元帥馬司徒請罷節度表二首

卧疾辭官表一首

代盧相公謝賜方藥并陳乞表五首

代賈相公乞退表一首

又代賈相公陳乞表六首

代魏博田僕射辭官表一首

代韓僕射辭官表二首

為鄭滑李僕射辭官表一首

代表相公辭官表一首

為楊相求退表

德宗

于

邵

建中二年

臣炎言比者盛夏無雨農人缺望遂軫聖慮迨乎孟秋
乃下明詔並表羣祀神人協和膏澤旋降嘉穀無害災

盛可期此皆陛下明聖慈仁上應臣所以慙冒重位容
身無地載積憂懼豈遑夙夜歷觀自昔帝王以理天下
者未有不疇咨訢謨以熙帝載三五以降則有六相十
六族共陳翼亮之功其在夏殷不易斯典逮周分六官
秦置左右西漢因之以丞相東漢更名以三公魏晉雖
有損益亦無獨任之道陛下拔臣江澤之外致臣密勿
之地縱欲思報鴻造贊襄盛業其如智識薄劣力所不
任常恐負乘之類無以塞責臣又聞之天有三台鼎有

三足疑丞所以備四輔股肱所以象四體創明堂構大
厦非一木之力焉况臣駑愚而久備位今舜干以化戎
狄脩好網羅再張兆人是賴朝多賢達野無遺逸一能
勝臣者則指顧皆是豈以萬務之重而獨委於凡流乎
縱臣一朝敗累分從隕越則既墜之跡死將安謝伏乞
俯迴天鑒退臣散地舉用伊臯使不仁者遠臣雖萬死
誓無所恨不勝待罪兢惶之至

河東副元帥馬司徒請罷節度表

德宗

崔元翰

興元元年

臣燧言臣聞享其名者必有其實受其賞者必有其功
臣以往年奉詔東征田悅尋又伏奉恩命加臣魏博節
度使方將收其土地撫彼黎人致天誅以伸威布王澤
而施惠不得不居其任何事而辭其後摧敗雖多剪滅
未即類表作則未其賊偷延數刻獨保孤城田悅以潰亂殞
身田緒以窘逼歸款聖恩復加弘貸悉復舊封以臣有
擒制之所係纏綏懷之所降附人徒之衆將吏之多特

勅別置保寧軍節度仍以臣兼充其使臣又方以勞來
為事實且慰安其心尋獨西討河中內清關輔事殷任
重勞力焦神正在憂虞未遑辭讓今臣舉軍還鎮解甲
息師况當歉歲未康疲人類表困苦復虛兼二使別創
兩軍職任既繁祿廩愈一作重倍且臣非有收郡邑壁壘
之實不宜復加名位非有保城池封畧之才不宜別開
軍府而乃妄為繁費謬積恩榮在私心懷苟得之羞於
國典為虛授之失伏乞罷保寧節度停臣此使以保寧

軍兵馬隸屬河東節度則聖朝有省約之利愚臣減盈
滿之憂且臣尊爵大官窮榮極寵何待加茲一職乃為
被以鴻私今保寧河東兵馬久同征行以相和協有同
一體不必異名頗亦便安伏希裁擇無任悃款之至

第二表

臣某言為臣之道臣實聞之有難則受命而不敢辭事
君無苟免之責已安則避位而不敢處量已無昧進之
譏况福過忌於滿盈任重憂於顛覆臣之所懼孰以

類表

作不為宜臣少無材能進非經術因逢屯難遂効驅馳陛

下每錄微功累加高秩皆緣恩澤備盡寵光名列台司

位兼宰輔總戎巨鎮

類表作防

居守舊都比又以東討魏州

招降頗衆伏奉恩命別以為保寧軍節度又以臣兼克

其使重以四征羣寇總帥諸軍加臣河東寧保奉誠等軍

節度并管内諸道兵馬副元帥臣亦欲懷來款附統一

携離以此因循不即辭避今者寇戎剪掃區宇混同方

將撫綏無事征伐則止不宜復居副元帥之任保寧軍

將士與河東將士久同居處並以和寧不必別為節度
伏請停此二使許臣但以河東節度使鎮守北藩猶有
尊官又兼寵祿以為厚甚不可復加雖尚偷榮近於量
力豈將飾讓於外實惟陳請於中伏乞聖慈俯垂照鑒
臣無任懇欵屏營之至

卧疾辭官表

德宗

齊

映

貞元二年

臣某言臣生何僥倖遇聖屬千年之運命何舛薄染患
逾十旬之程法既限於朝章事竟塵於天聽惶懼戰灼

不知所圖臣某中謝臣自三月天澤傍流御醫親降膏
肅既辨沉痾日輕但於寢疾多時羸頓猶甚支體骨立
氣力憊然審慮旬日之間未任朝謁之禮更以法資畫
一令在必行豈以微臣虧於大憲况中書近密樞務重
切不可一日而闕臣以累月在假頗為曠闕罪實難逃
更乞淹延心何自處故臣之陳奏非敢竊退讓之名臣
之懇誠非為追止足之誠直以當其無病猶不逮人既
以違文豈堪玷法伏乞弘廣運之道崇大中之規是歸

執象之言以副垂衣之理豈微臣幸甚實彝章幸甚無
任誠懇之至

代盧相公謝賜方藥并陳乞表

德宗

權德輿

見集本

臣邁言臣自染偏風今已彌月將息未減渥澤轉深伏
蒙特令供奉僧智昌醫療每日令中使存問及賜柳湯
煎驢頭方仍便令服餌者臣以庸賤昧於攝理久茲竊
位常懼害盈陰陽之和無補時化風毒生疾上煩聖慈

靈方御醫稠疊備至雖受恩服藥誠合漸瘳而福過災
生慮難自保况中貴將命寵臨私門犬馬之微日塵黷
續或有加減自合上聞非常之恩伏乞停罷且台司要
重庶政泉源以臣平居素積官謗今右邊手足動用不
隨自滯枕席已淹弦晦伏乞以時免職使得養疾家居
博求上才用塞人望則公朝無覆餗之責陋質荷生成
之仁今攝衣拜章力且未足口占代署貴達愚衷無任
感恩迫切之至謹奉表陳請以聞

貞元十二年
十月一日

第二表

臣某言臣以疾病所嬰在假既久自審不逮遂有上陳
詔旨優荅懇誠未允屏營慚懼不知所安臣聞為官擇
人各司其局條貫責實

集作條
責實効

共致理平凡在庶僚猶

不可曠况宰臣之任鼎足承君調和陰陽左右教化能
否之下利害繫焉苟有所壅其傷必大以臣虛薄備位
四年奉勵精之勤但樂昌運當具瞻之地莫負羣心書
曰百僚師師百工維時言得其人也語曰陳力就列不

能者止言審其分也况沉頓逾月冠帶未任風毒所侵
惟望速差彼其之刺倍切於今以被病之微臣尸台司
之厚祿自知不可如公議何伏枕披誠再黷宸衷冀迴
天鑒俯遂愚衷所謂曲成豈惟平施無任惓欵迫切之

至謹奉表陳請以聞

貞元十二年
十月八日

第三表

臣某言臣逼於疾瘵累有陳奏再奉詔旨私願未從感
恩則深量力難濟况偏風狀候與諸疾不同雖時似少

減終慮成沉痾中樞務重不可闕人自臣在假已四十
餘日曠廢斯甚兢惶益深一夫不獲一吏不職則繫聖
慮以之憂勞今臣手足未平心緒未復卧受豐祿胡顏
自安伏惟陛下順天理物躬勤庶政事無細大咸遂其
宜豈可獨私微臣久玷時化是以直疏誠懇不敢苟飾
煩詞冒躡宸嚴期於照鑒無任惶怖震越之至謹奉表

陳請以聞

貞元十二年
十月十六日

第四表

臣某言臣素以庸虛又嬰疾病半年在假未任出入四表上陳備盡誠懇過蒙渥澤特賜優容聖慈則深私願猶阻俯仰衽席兢惶靡寧臣本謂至春和得漸平復今方藥遍用根本未除雖簪帶假人得以被體而趨步無力難於拜恩輔臣之任百碎是仰遵守法度誠所宜先豈有踰歲家居尚塵鼎飪况所受厚祿出於疲人竊位公卿尚知不可沉疴私室何以自安易象害盈實在今日伏惟陛下弘覆萬物曲成不遺允在懷生各得其所

以臣沉痾久曠官司前後臣聞披瀝肝膽期切之至謹

奉表陳請以聞

貞元十二年十月二十五日

第五表

臣某言臣待罪非據歲時已深寵秩逾涯災患自至一
從移病忽及周月五獻章表未遂血誠沉痾之身滯於
牀枕職守之効絕於官曹虛費祿廩不安夙夜遂於本
年五月二十八日進狀乞停俸錢自後不敢更有請受
竊冀素餐之責少息輿議再懇之至上迴聖心邇來又

經九十餘日承命未下憂惶無措蓋聞祿以詔功又以
養賢以臣之愚而無功績久此尸曠俯仰內訟逼於公
私臣之情理實為難處臣之言詞不能自達使得終獲
退免曲遂微誠亭育深恩實在於此無任猥逼懇款之
至謹奉表陳乞以聞

貞元十三年
九月某日

代賈相公乞退表

臣耽言臣以庸愚謬尸寵祿位居師長職重台司徒叨
渥恩無補時化跼躅荏苒六年于茲去秋以來多病相

繼每自策勉以奉休明而筋骸內衰官謗外積近染痢疾綿歷旬時進退之狀不恆寢食之理皆耗伏寢循省無所克堪凡在常情皆願貴仕况臣累蒙任使實越等

夷從容廟

集作朝

堂沐浴天澤恩私歲久誠每切於匪躬

疲滿日侵事有逼於量力伏惟陛下覆育臨照曲成不遺俯矜愚衷移授散秩則樞軸不曠輪轅適宜拳拳之誠所望斯足無任懇欵惶懼之至謹奉表陳請以聞

貞元

十四年七月二十四日

又代賈相公陳乞表

順宗

臣耽言伏奉今日制除臣檢校司空兼左僕射依前同
中書門下平章事祇荷成命捧戴恩私心竄震驚慙怖
失次臣以庸薄無他才能先朝過聽謬賜驅策叨居鼎
飪十有三年猥承雨露之恩終闕涓埃之効累經陳乞
未允懇誠復以餘年再承休運集作命自陛下紹集作纂膺
寶厯澤被羣生亭育所加飛沉遂性而臣齒髮頽暮疾
恙嬰侵筋體集作骸日衰心力皆耗况宰相之職用調陰

陽司空之官實平水土從古授受重難其人以臣平居
猶知不可今中既眩耄外亦支離寢興不安言語失次
豈可苟貪貴任上玷清時省躬則然況在公議古者君
有致政之惠臣感得謝之恩鐘鳴漏盡前哲所誠年衰
疾劇在臣為甚逼於情理敢躋天威悽悽血誠期在鑒
聽無任懇欵恐懼之至謹奉表陳讓以聞臣耽誠惶誠
恐頓首頓首謹言

貞元二十一年
三月二十一日

第二表

臣耽言臣以疾病所逼氣力不任輒露懇誠上祈退免
聖慈備至私願未從詔旨便蕃慰勉纖悉自宜策勵以
奉休明蠖蟻之誠敢忘夙夜犬馬之疾日益纏綿視聽
昏煩舉措乖誤心不記事口不逮心神理害盈正謂今
日昔韋賢致仕著在漢庭韓厥請老書於魯史豈可以
茲沉廢苟汙班榮逼於公私非敢撓挹自聖明馭宇動
植覃思豈於庸愚獨阻誠志乞迴天鑒俯遂殘生伏紙
上陳感涕嗚咽無任惶懼懇切之至謹再奉表陳乞以

聞臣耽誠惶誠恐頓首頓首謹言

貞元二十一年
三月二十七日

第三表

臣耽言臣殘年沉痾漸不支持再表上陳未蒙允許顧
茲朽質徒感鴻私而枕席纏綿形神消耗上台之任歲
月積深大病之期晦明難保自叨升論道扶疾拜恩邇
來狀候日以羸瘠集作頓災因福過足驗於今伏乞賜臣
骸骨收臣印綬期於必遂不敢煩辭無任量力懇迫之

至謹奉表陳乞以聞

貞元二十一年
五月二十日

第四表

臣耽言臣聞生人所欲豈過富貴仕進之榮無踰公相
臣受祿過厚叨恩且深疾瘵所侵日月以甚表章三上
宸睠未迴蕭然私室溘盡是慮臣頃歲齒及懸車疾經
百日輒援禮令乞遂休閒先聖優容未蒙允許

集作
於允今

則桑榆轉逼沉頓寢深比於往年遠不相及前後陳請
備竭肺肝特希聖慈俯鑒愚懇羸骸假息所望退身瀝
血披誠伏待明命無任屏營懇逼之至謹奉表陳乞以

聞

貞元二十一年
七月二十二日

第五表

臣某言臣以庸愚累叨爵命大行皇帝拔擢非次列於
宰輔歲時寢深塵露無補太上皇踐祚聽政寵登三公
而臣寢疾所嬰已在牀枕沉疴日劇氣力漸微自春涉
秋四表陳乞伏遇陛下繼明纂統臨照萬方澄清化源
朝野相慶但臣百疾所湊四支不任豈使將盡之人猶
處具瞻之地私誠所逼上黷宸嚴既非矯一作飾讓期在

聽納無任懇款逼切之至謹奉表陳乞以聞

永貞元年八月八日

第六表

臣某言臣犬馬之疾福過災生前日以來轉就危困自量氣力的不支持自陛下嗣纂睿圖臣已寢疾一作綿

亟竟不得一趨陛下謁龍顏幽壤之中以此為恨臣備位宰相歲時最深永歸泉下無補明代伏惟陛下為萬姓自愛則幽明蒙福無任感恩哀戀之至謹奉遺表以

聞

永貞元年十月十一日

代魏博田僕射辭官表

臣某言臣聞中原息戰子房得以乞身東吳既平范蠡
終能行志二臣皆因時効用遇主成功進咸展於盡忠
退各安於秩考所以立名萬古保慶一時愚臣夙心私
有所慕况蒲柳先邁駑蹇易疲審已無堪量力知止吐
誠上達罄寫中懷仰觀天慈俯照愚悃中謝臣雖長於
戎旅幼業詩書每凜効忠之言早勵為臣之節當河朔
承襲之日在軍幕危疑之間每動險中幾隣於死常以

捐軀報國率彼頑人受命指蹤掃清餘孽用攄宿憤

一作

志

以荅明時一覩天庭百生願足但懷感激豈意遭逢

伏遇陛下神武應期聖謀獨斷臣得進陳忠款見委赤

心唯將擐甲啓行執爨畢力上憑睿筭凶寇自夷今日

獲覲天顏躬承睿渥平生之願既遂休老之志宜申豈

可更貪寵光久冒榮祿使貽官謗取笑將來臣自總魏

師初率歸化當時結念便誓此心祈於

一作終始

素誠非是

飾讓匹夫之志猶不可奪臣昨自離本鎮亦以此意明

言陳諭聖恩勉其忠義將士等皆懷皇化盡激丹誠則一軍幸安且無足慮在於今日臣何所任豈可久職妨賢待譏竊位此時不退何日宜退臣犬馬之齒未云甚

高筋力之間已知不健

一作速

加以少罹憂患鬢髮早衰

久經行陳心力已耗若許其優養或冀保餘年僅抑其愚性則生理必阻且身兼將相人臣之位已極滿朝子弟人臣之家至盛於國何補獨荷殊私所以憂餘惡盈樂在知足擊壤自歡於聖日懸車豈待於禮年是用瀝

膽披肝冒昧陳乞伏惟皇帝陛下德邁羲軒恩深覆載
蕩除餘祲理致太和動植含靈無不遂性方將旁求英
俊共洽昇平如臣以鷹犬之微獲申搏噬累塵高位常
積厚顏福過災生自當勇退且富貴榮樂是入所欲苟
心所有尚意趣或違彊其不能適足增苦儻蒙思造獲
遂優閒許歸衡茅取樂餘齒是天地曲成之德君父莫
大之恩五湖迴舟生無慙於越相都門揮手死不愧於
漢臣言披血誠情切中素無任悃欵懇逼之至

代韓僕射辭官表

張述

臣某言臣以夙疾多時受任非淺常有負覲冒據官榮
將貽折足之尤以速素飡之謗昨者輒陳章疏冀蒙矜
免不意血誠徒懇聖慮未迴懷荷寵私有如冰炭臣聞
力小任重久則致敗功微祿厚過則生災故經垂知足
之言易著負乘之誠皆明力不勝任才不當官臣雖孱
微嘗所執守且臣受鉞閫外二十一年弟執金吾男居
藩服窮極寵幸萃臣一門每夙夜憂惶常恐身先犬馬

不獲策勵駑蹇上報鴻恩今臣實懼不逮是以告訴况
臣心力未減猶可支持筋骸已傷或難勉彊伏望聖慈
哀察賜徇一作鑒懇誠恐其再有陳聞許以病免丹款儻
遂沒齒為榮無任懇逼之至

第二表

臣某言伏以累獻表章微誠務達屢陳聖聽罪犯已多
臣聞固陋寒賤人之所惡富貴榮達人之所欲自臣忝
謬即宜推陳豈可蓄縮偷安致數一作依違苟得若禮一作命字

乖當植得者不勸

一作榮

故禮以旌德賞以勸勞諒或苟

差何以沮勸臣自叨幸高位二十一年手足病風十有

餘歲每恨國恩未答沉瘵遂嬰命竊極於公侯身實隣

於廢棄幸逢明詔獲覩闕庭天顏咫尺之間稠疊慈諭

彤庭拜舞之際宣

一作曲

賜人扶焉有臣對君上獲此恩

禮陳于明庭雖丞相乘車入朝鄴侯劔履上殿臣忝

一作

方倖倖竊被殊榮未知何功寵光及此史冊莫載今古

全無皆陛下降稽天之仁垂極地之德特開貸納俯賜

含容君父之恩不可稱量臣每退朝之後感極涕流唯
思訓子導孫披誠瀝懇率令致命不止終身盖由感深
遂切肌骨但臣去就如此保固官榮尚稽覆載之私更
安顯重之位則何以標明賞典準約朝綱臣是以陳露
鄙誠罄竭於此昨者再披悃款冒死奏聞蒙賜批諭特
加獎飭錄其微功未賜允從臣今輒敢復獻表章觸法
陳乞特仰恩私養疾衡門則陛下無虛授之名微臣免
曠官之責不奪之志告訴豈懼於再三觖望之誠允許

庶幾於萬一陛下倘恕塵黷俯察區區容其病免以徇

誠請

一作情

雖死之日猶生之年臣無任

為鄭滑李僕射辭官表

臣某言臣聞虞舜之朝九官皆讓西漢之盛二疏云去
蓋上以淳風盪俗下以廉耻激節故也况寵辱之際不
驚則愚進退之間不知則殆中謝伏惟皇帝陛下德超
邃古功格上玄誕敷文教丕變頽靡天地日月載惟貞
明動植翔泳罔不咸若臣某席以枝蔭階緣休運弱齡

入仕四紀于茲三省微躬一何厚幸是以每涖一職每徙一官未嘗不心効權衡操懷竹柏雖齷齪廉謹曾無異績而毫釐過犯未污簡書知臣在君匪敢矜述自陛下嗣臨寶位一十七年不以疲駑猥蒙獎拔授以疆土假以麾幢入居宗廟之司出典股肱之郡八座之貴臣拜者三六條之榮臣守其五四開戎幕一佐中軍至如宮相臺丞侍臣遙節兼命稠疊累遷頻速輝光既極盈滿是憂間歲初領華州方宣聖澤俄以滑臺選帥非次

及臣雙旌自天匹馬之鎮此州當四達之地控兩河之境兵雖勁逸人至凋殘臣遠仗皇威推誠撫衆服勤吏事盡瘁牧人遂得黎庶就耕織之時士伍知訓習之禮此皆大化光被臣敢貪天之功常恐三至奪慈孤立速謗此臣所以怵惕惟厲中夜以興願披血誠上達旒宸伏惟陛下少加憐察臣竊以酬恩狗節心實無涯引重致遠力誠有極臣先於嶺南染風毒脚氣今年春又患發鬢分將不起命及阽危幸沐亭育之恩免從帷蓋之

斃臣年逾知命齒髮已衰疾經沉痾方寸頓減久當繁

劇必慮闕遺臣又聞制

類表作分

閫者以重鎮為雄仗鉞者

以專征為務臣器幹不足以在

類聚作獨

任方畧不足以持

權何以統節制之師貞定否臧之戎律臣且陳力就列

訓誥攸存審才則然以病宜免况巖廊多士宇宙無虞

為官擇人皆出臣右胡可晏安冒寵尸素妨賢乞降賜

骸之恩以全折足之咎臣獲退就散秩保養餘年

類表作生

候筋力之復彊申赴蹈而寧晚臣於當

類表作所

部勸課營

田及以羨餘優恤將士等事一一別具條奏冀明輯睦
上副憂勤塵黷宸嚴冰炭交臆無任懇切屏營之至

代裴相公辭官表

文宗

劉禹錫

太和四年

臣某言臣去冬得疾近日加

集作方

劇西夕之景豈能久

留及其未亂披露誠懇臣犬馬之齒六十有七壽雖不
長亦不為短位忝公台近十五年皆由際會非以才進
常懼官謗以招國刑令被病得死保其始終為幸甚厚
豈復咨嗟所恨者遇聖明之君不得佐成太平之化自

量氣力忽恐奄時

一作然

則心有微素無階上達伏惟聖

慈照鑒臨而察之中謝伏惟

集作以

三公非曠職之地宰

相非卧理之官臣伏枕之初已有陳乞請罷真食兼辭

貴階

集作之陸

伏蒙優詔纔遂一事頗降中使慰勉再三專

令御醫旦夕診視苟安名器不覺經時主恩則深公議

不可伏思陛下臨御之始宰臣四人逮今零落忽已一

半臣且危懼餘年幾何唯易直外鎮獨得無恙竊持此

理權位難居伏乞賜臣停官許在家養疾就間辭祿或

冀有瘳害盈福謙固是神理倘天眷綢厚念以服事多年臣之所陳未蒙便遂則國朝勲舊以疾辭一作辟位者皆得致仕使其家居足以頤養既有成例著於舊章伏望天恩特賜哀允

文苑英華卷五百八十一

欽定四庫全書

文苑英華卷五百八十二 宋 李昉等 編

宰相雜謝一

雜謝表二卷英華所編
失年代今以先後正之

為左相宗楚客謝知政事表一首

為宋尚書謝加三品表一首

為兵部王尚書謝加門下三品表一首

代宰相謝加銀青并郡公表一首

謝門下侍郎平章事表二首

代嚴大夫謝黃門侍郎表一首

為盧相公謝除中書侍郎表一首

為趙庶子謝平章事表一首

為崔相公謝門下侍郎表一首

代杜司徒謝平章事表一首

代人謝平章事表一首

代王相公謝加門下侍郎食邑表一首

代崔相公謝加中書侍郎食邑表一首

代史館王相公謝加食邑實封表一首

代中書孫相公謝登庸表一首

代陸相公謝再入表一首

代史館王相公謝監脩國史鹽鐵使表一首

為左相宗楚客謝知政事表

武后

李嶠

長安四年

臣某言臣志識無取才藝缺然叨預葭莩遂昇班秩彈冠受檄曳組登朝內府尸榮以招官諂中臺揆務愈塵政本聖恩無限天造不貲仍屈帝難俾參皇極西雍之

羽仍所庶幾東郭之毫敢陳誠請九霄從邈三舍不迴
嚴命必行醜顏何寘方持畫虎且對羣龍遂以挈瓶謬
膺和鼎空銜作礪之命豈庶磨鉛之功祇拜寵臨伏增
慚惕無任悚戴屏營之至謹奉表陳謝以聞

為宋尚書謝

一作讓

加三品表

睿宗

蘇頲

景雲元年

臣某言伏奉制書加臣為銀青光祿大夫餘如故寵榮

俯臨

一作寵臨俯逮

惶怖交集臣某中謝臣爰自弱齡素無一

一作

微遠操僣俛職事豈期聞達二朝揚歷數載塵冒以茲

過聽皆是曠官內省寂寥長懷愧負陛下聖明御極多

士如林不以臣不才擢升宰輔每侍帷幄未能昭宣景

化頃司衡鏡未能澄汰流品

一作流品

若臣之咎將何以逃

又擢

一作採

臣於循良之末賞於廉問之間

一作舉

遂出常

規猥班休命臣之涯分頓為忝越比者應踐榮秩各限

格文欲使無相奪倫較若畫一臣課効多闕勤勞未著

爰屬首秋尚居五品名聞之始階方泛及格限之內考

復相懸臣何人斯忽當今授臣縱不能鎮靜流弊安敢

不罄其愚直首虧不刊之典坐取非據之榮進退失圖
心顏何寘况國之程式示於天下凡有虧紊過在大臣
臣自違之復將焉用臣年未知命識非半古旋叨厚祿
仍受隆寄求國章其已默一作而顧身老而必然聖朝

有刺於在梁微臣生災於瞰室豈唯簪紱之耻抑亦邦
家之羞伏乞天恩曲流成貸矜其至懇知匪飾詞反汗

收綸亦

一作實

臣之幸臣無任切逼之至

為兵部王尚書謝加門下三品表

玄宗

張九齡

開元十一年

臣峻言伏奉今月二十九日制敕授臣兵部尚書同中

書門下三品殊常寵榮

集作靈

妄集疲朽承恩竊喜任重

憂深

集作惟憂

臣誠懼誠恐臣伏以虛受之難魯史誠以量

力滿盈之患

集作過

夏載陳其招損

一作損並非

臣昔

集作階

緣

試吏際會登朝遂得入拜尚書比天之喉舌出鎮方伯

集作出

為王之爪牙雖忠烈之誠心知所竭而績用之

美歲久無聞今陛下不以為愚

四字集作不能為光為寵

寘之廟

堂之上委

集作參

以軍國之謀實恐鼎足不任鶴翼為刺

退失微臣之守上累陛下之明是以一

集作永

夕九飛終

朝三省泉谷為懼水炭在懷道路改觀於將行班位

一作

列

固慙於幸得

十四字集作道雖願於將行位固慙於幸得

臣已有別狀具

所讓人猶蒙曲私未寢嚴命方欲俯僂恭命對揚休光
磨鉛効於一割策蹇同於十駕臣誠懼塵台席繆齒國
華將何以允答鴻私弼諧大化拜命祇懼罔知所為臣
不勝荷懼之至謹奉表陳謝以聞臣誠惶誠恐謹言

代宰相謝加銀青并郡公表

臣某言伏奉今日制書加臣銀青光祿大夫特封河內郡開國公食邑二千戶承命戰兢伏詔惶駭拜抃一作舞

無次感涕失容中謝臣累代宗儒傳經素位所以勉脩學藝將業其官而文愧承家識非半古本期代耕之祿稍階載筆之地幸忝近署久侍內朝謬霑雨露之恩頗甄歲月之効獲承大命謝謨訓之規載忝有司無辨論之實既虛職守常懼滿盈無日不思每期負敗當時同

列咸

一作衆

所明知豈意朝廷方正於紀綱天地忽私於

微細擢升佐輔望出羣情陳乞靡從曠廢何甚在萬邦

之化首處百辟之儀刑出自諸生猥當非據所以風雨

愆候年歲不登邊徼

一作檄

交馳田租減耗凡此數事職

臣之由歷觀舊典合貶優秩累因陛下奏獻封章天威

俯臨微誠屢奪雖澁懇無報期至誠必通上仰於朝庶

幾諧願受策於第是所甘心方祈獲免之時更遇非常

之賜特承七命之貴超過八階仍叨五等之榮坐封千

里雖庭堅謨弼之德山甫將明之才頓遇今恩亦稱踰
分况臣道慚先哲識類平人未遂退還已紆聖眷頻繁
寵拜實懼宸命一作神明伏乞俯照血誠特廻睿旨夫上有
無功之授則下多不勸之嫌涓滴之勞未彰於近掖風
塵之議將集於遠方所以撫心疚懷不敢奉詔拜手流
汗詎容飾詞無任慙惶之至

謝一作讓

門下侍郎平章事第一表

代宗

常

袞

大曆十二年四月

臣袞言伏奉今日恩旨除臣門下侍郎平章事祇奉失

圖進退無據捧詔驚

一作兢

駭銜恩戰惶微存懇誠得自

陳露臣某誠惶誠恐稽首頓首臣本粗傳舊業猥以文

藝獲

一作辱

於職官去歲已前尚忝絲綸之末今年夏首

一作首夏

遂登鈞石之司舊德名臣當朝宿齒不忝此選獨

進非才撫已再思胡顏自處伏以朝廷新有處分重舉

典章而上稟睿謀下清庶品

或作物

通於元本

一作元本或作元品

猶懼匪服之嫌訪於顓蒙將貽覆餗之責伏乞俯迴天

鑒更擇時賢則三階有協贊之功兩府無虛尸一作曠之
誚無任惶恐之至

第二表

臣袞言臣退省無堪恐辱所一作授是一作以昧死上

言拜手頓首讓于百辟一有士冀迴宸鑒以遂至公鴻

私復降墨詔未允慙赧惶怖不知所圖臣某誠惶誠恐

稽首頓首臣聞左右惟賢國安在相處具瞻一有儀之

地當賦政

一有興
化字

之源故有開必先玄感幽贊軒皇則

三台作配虞舜則五臣

一作老

同遊殷夢帝而得說周降

神而生甫用能洽皇王之道致天地之和至於漢興一

用人傑爰及江表猶擇

一作資

偉才當此大任固非常品

臣性惟愚拙才無經濟徒以趙宮覩聖逮事先朝潁川

扈蹕獲承中顧凡所履歷莫非塵忝出於始望之外不

知自至之由豈謂玄造曲成大明私照俾佐邦政得參

廟謀

一作謨

竊以當今樞務之重在昔上公之任臣識非

通鑒

一作傳

不可以論道文非雅正不足以經邦德不能

鎮撫四夷政不能親附百姓况戎車尚駕邊患未寧方

欲弘濟艱難以崇大化豈齷齪

三字一作故非齷齪

廉謹所能稱

職若不自揣度苟貪寵榮寧止尸官備員期於鼎折棟

橈伏乞訪求羣議選用上才使聖朝有則哲之明臣下

無虛據

一作受

之責躋天跼地

一作傾血汚地

誓將死請如或聖

眷俯迴實亦天下幸甚無任懇逼屏營之至謹奉表陳

乞

代嚴大夫謝黃門侍郎表

臣武言伏奉今月十日恩制除臣黃門侍郎忽降紫泥擢升黃閣出自非望感恩戰懼臣某中謝臣才乏經綸時逢際會累更天秩何補聖朝三踐掖垣九除憲府久

慙在政

一作有慙達政

空忝觸邪犀節四持亂繩不理牙璋再

建

一作馳

橫草無功既曠職於神州又尸官於華省屬犬

戎猾夏鑿駕省方未殄國讐正當臣辱陛下分麾以討傳檄自安空隨冗從之流竟乏橫行之議尚多淹致

一作

尚淹

致命仍更冒榮方扈宸遊遽膺夕拜久缺斯任永難其

人本求英儒將備顧問素無學術何以允諧竊汙軒一作

詩

屏謬塵闈寵榮非望祇荷失圖思重才微難於捧

戴眷深効淺祇益兢惶上答生成唯知死節無任感戴

屏營之至

一作皆唐類表

唐門下侍郎

黃門東臺鑿臺同

掌二侍中之職帶平章事

者固是宰相如褚遂良崔日用皆為黃門侍郎或

叅綜朝政或叅知機務亦宰相之任今嚴武表誤

入宰相門殆以此耳

為盧相公謝除中書侍郎表

貞元十一年
正月六日

權德輿

臣邁言伏奉今日恩制授

一作命除

臣中書侍郎同中書

門下平章事祇奉詔命循省妄庸感恩量力不知所措
中謝臣聞宰相者叙四時之化順萬物之宜用贊裁成
使之茂遂而中書密勿庶政本源以奉大猷是為右弼
臣實凡輩本無他能家尚儒風獲承緒業因緣忝幸踐
履班榮誠不自意忽焉過量台司待罪已涉三年妨賢

既久內省

一作訟

彌切蓋廉謹戒懼人之常分而訐謨教

化宜擇全才陛下在宥萬方躬勤百度豈虞賤質再沐

睿慈特遷紫薇實玷皇極臣面所陳讓推於至公天鑒

未迴進退惶灼且使

一作假

人以器知臣者君猶冀鴻私

俯察愚懇害盈之禍敢受微軀覆餗之憂難抑公議無
任感恩怖懼之至謹奉表陳謝以聞

為趙庶子謝平章事表

貞元十二年十一月十一日

前人

臣宗儒言臣伏奉今日恩制除臣為同中書門下平章事祇荷承命捧讀詔書心魂震驚拜抃失所中謝臣聞燮贊化源參和鼎實上合一德以平六符苟非其所繫斯重臣本虛薄素無器能徒以文藝獲承代業比肩多士陳力清時累叨渥恩踐履官序頃歲奉職中禁草議南宮遂忝左曹列於近侍顧常內訟已慮曠官豈惟宸眷特加擢在非據伏自循省不知所安且臣去冬尚守郎吏今纔一歲遂備台司苟

集作自

非全才難塞公議

雖鞠躬匪懈心盡事君之誠而宣化賦政恐累知臣之
舉生成難報覆餗足憂伏以面奉德音不敢更有陳讓
拜章感涕上答何階無任荷戴惶懼之至謹奉表陳謝
以聞

為崔相公謝門下侍郎表

貞元十四年七
月二十七日

前人

臣損言審已無庸謬膺寵授昨所陳讓逼於懇誠冀全
至公豈敢外飾黃閣務重非才實難墨詔復臨捧讀增

懼臣聞惟君知臣任之以器惟臣事君量而後入生逢

昌運自比可封之人職任

集作佐

台司難逃竊位之責三

年待罪表章不敢累瀆宸宸雖誓心畢命以竭微衷而折足覆餗其如公議無任感恩惶懼之至謹奉表陳謝以聞

代杜司徒謝平章事表

劉禹錫

臣某言臣伏蒙獎拔超踐鈞衡慮玷大猷味死陳讓再奉嚴旨不令固辭恩厚命輕位高責重中謝臣聞天下

安危注意將相處論道具瞻之地當總戎作鎮之權雖
叶夢而求無聞秉鉞之寄登壇以拜不兼調鼎之榮授

受

一作命

惟難伊昔猶爾况臣庸瑣

類表作蒙瞽

何以克堪陛

下玄造曲成大明私照俾掌戎律復參廟謨寵光之命

在臣已極毫髮之効於國何施謹當罄竭微誠奉遵至

教仗天威以懾不順

類表作類

敷聖澤以遂羣生上分盱食

之憂下塞素飡之責力誠不足心實念茲伏乞皇明俯

賜照鑒臣恪居官次遐守藩維不獲伏謝彤庭陳露丹

慊

一作悃

心存闕下同犬馬之戀恩身在淮濱仰雲天而

結思

一作恨

無任懇悃屏營之至

代人謝平章事表

穆宗

白居易

長慶二年

臣稹言伏奉今日制書授臣守本官同中書門下平章事者殊常之命非望之恩出自宸衷加於凡陋竦駭震越不知所為臣某誠惶誠恐頓首頓首臣伏惟近例宰相上後合獻表陳謝臣今所獻與衆不同伏惟聖慈特賜留聽臣伏聞玄宗即位之初姚元崇為宰相元崇

欲救時弊獻事十條未得請問不立相位玄宗明聖盡
許行之遂致太平實由於此陛下視今日天下何如開
元天下微臣自知才用亦遠不逮集作元崇若又僂俛

懷安因循保位不唯恩德是負責實亦軍國可憂臣欲候

侍

集無
侍字

坐對時便陳當今切事下救時弊上酬君恩臣

之誓心為日久矣陛下許行則進不許則退進退之分
斷之不疑敢於事前先此陳啓况臣才本庸賤遭遇聖
明天心自知不因人進擢居禁署方以密謀恩獎太深

讒謗並至雖內省行事無愧於

集作所愧

心然上黷宸嚴

一作

聽

合當死責豈意憐察曲賜安全螻蟻之生得到今

集作

自

日超越流輩授以台衡拔於萬死之中置

集作致

在九

天

集作震

之上捫心揣已審分量恩陛下猶不以衆人之

心待臣臣豈敢以衆人之心事上皇天白日實鑒臣心得獻前言雖死無恨無任感恩懇款屏營之至謹奉表陳謝以聞臣某誠惶誠恐頓首頓首謹言

代王相公謝加門下侍郎食邑表

昭宗

錢 珣

臣某言昨蒙恩命授臣某官等者今日日已奉表陳讓
跪承批詔未賜允從方就日以傾心若履冰而舉足臣

某中謝臣立朝

一作身

守嗣莫繼前脩學古入官敢期高

位伏遇尊號皇帝陛下道惟樂育志在紹聞待河清而
先靜化源致俗阜而深探理窟當乙夜縱觀之後啓輔
臣夢得之休而遽以平衡授茲弱質頗乖庶政莫達大
經何施作相之才但累知臣之鑒厭兵而五兵尚在唯

恐人殘祈穀而百穀未升仍憂歲旱尋宜待罪已合避
賢陛下慎以退人容於竊位兼迴睿睠遽正台階進當
浴鳳之榮更懼惟鵜之刺况增封建俾重弼諧臣且自
量則為不稱是以陳辭瀝懇冀動天心拜章而方謂可
安捧詔而未嘗得請尚希終收渥澤遂寢典彝苟責實
而有聞信假寵之非晚徇之公道寤主所圖受爵既多
懼君恩之太盛省躬甚拙知官謗之必興負戴聖慈臣
某無任感激兢悸之至

代崔相公謝加中書侍郎食邑表

昭宗

前人

臣某言伏奉今月某日制書授臣中書侍郎仍進封開國子加食邑二百戶者寵踰素分憂集微躬臣其中謝臣聞當可舉而後行則彞倫叙見有功而後進則勞臣勸如或行不可舉進不見功是謂謬恩實維一作虛授臣學非練達質異溫良致身而敢望坐茵措手而寧期補袞嘗塵侍從且昧論思既無酒誥之能莫並食時之

敏忽蒙聖造遽委化權佐運行而不應中台論燹理而
未周四序何言睿澤曲被微臣纔叨正秩之榮兼進疏
封之命戴恩無力臨事知非將投盈篋之書寧用濟川
之楫願迴玄鑒俯徇愚衷致公器之無私在國章而克
益一作重光昭一作聖德復戒貪夫仰望皇私臣某無任
懇悃激切兢悸之至

代史館王相公謝加食邑實封表

昭宗

前人

臣某言伏奉今月某日恩制加臣食邑實封若干者充位代天無名益地祇膺茂寵併集百憂中謝臣聞賞以昭其功典以載其事是為重柄用合大經苟功不足昭事非可載濫承休命實累皇猷臣謬執化權無裨衮職徒見容於君父每受責於神靈頃者陛下薄狩近藩復興否運寬仁屈已神武去邪敢有惑於羣謀實無渝於睿斷寰區之內耳目同驚此非臣醒齷之心所能匡替重圖反國艱若設都伏戎師以經營寄輔臣而鎮撫秦

人載聚周廟克成千門既啓於建章萬騎仍隨於司隸
宸居復正懸法更高又非蒙昧之才所能施展荷玄一作

景 貺而寧參天力奉清光而徒和山呼無補艱難方懷
慙懼詎謂聖慈忽被異數仍加賞優而欲舉何功典重
而將言何事况乎真食尤曰寵榮輕行於富庶之秋皆
期必稱尚屬於艱難之日焉可非宜伏冀聖慈必收殊
渥臣某無任仰望逼切懇悃屏營之至

代中書孫相公謝登庸表

前

人

乾寧二年

臣僇言伏奉今月某日制命授臣中書侍郎同中書門下平章事者渥澤自天怔忡無地臣某中謝臣聞佐天子理陰陽撫四夷遂萬物者宰相之職也然而能經國則可以佐天子達化源即可以理陰陽善柔服可以撫四夷適方圓可以遂萬物今臣才非經國智昧化源不知柔服之謀未達方圓之道使之執政必致曠官伏惟皇帝陛下與天同覆與日合明有言必訪於芻蕘有用必搜於林藪今者初當出狩且欲興戎脩至德以弭災

動神機以伐叛復亨否運昭告玄穹是宜慎擇賢良光
輔睿哲臣志雖懋學器異混成但為章句之徒莫應權
衡之任陛下明恩委照聖鑑洞開拔於駁正之司置在
仰成之地越諸彛典授以洪鈞空驚行潦之流忽載大
川之楫遭逢獨異寢寐終疑願迴非次之榮且降可行
之命立朝在野必有其人省已捫心莫知所措臣某無
任感恩荷聖兢懼屏營之至

代陸相公謝再入表

昭宗

前

人

光化二年

臣辰言臣昨蒙恩制除授中書侍郎同中書門下平章
事今日面宣聖旨不令更有陳讓者臣聞虞舜成湯之
為君也舉臯陶伊尹之賢處補袞宰衡之任不仁自遠
大道甚夷上可致君下可遂物相須之用古策具書獲
彼寵靈再當燮理仰成之重內省至難披肝膈之所藏
冀封章之可達煩言無取睿睠莫迴親奉清光復傾丹
懇讓不容於稽首進何務以沃心臣誠憂誠感頓首頓
首伏惟尊號皇帝陛下濬哲守文高明立極廣好問則

裕之美推任賢勿貳之誠思舉直以化人待封比屋念
偃兵而屈已欲拜昌言是宜慎擇濟川博求在野並稷
契之稱前代若姚宋之贊本朝使竭謨猷以光輔弼臣
器殊王佐質謝卿才常念立身但希承嗣未曉必聞之
政合居不急之官雖臨事秉心如秤敢期於輕重而自
天率性佩弦亦戒於因循頃者徒幸遭逢且乖斟酌既
塵公餽果驗素飧旋叨就列之榮每荷匿瑕之道今者
忽流霑澤又執洪鈞信夢寢

一作寐

之難期詎蒼龜之可

卜項雖當軸竊類代庖是非誠畏於人言去就敢違於君命中台不耀先慙箕斗之光元首自明何効股肱之力銜恩匪稱揣分彌憂詞不盡於抽毫淚空知於承睫負戴聖造辭莫能揮臣某無任感激榮抃屏營之至謹言

代史館王相公謝監脩國史鹽鐵使表

昭宗

前

人

乾寧四年

臣博言伏奉今月某日制書加授臣門下侍郎監脩國

史克諸道轉運鹽鐵等使者進當辨色動乏書思寵光
忽降於昭回循揣空知於隕越中謝臣聞可衛社稷謂
之大臣有利國家是為公輔大臣所以能經濟公輔所
以竭訏謨儻昧於斯則同備位臣為儒孤陋守嗣陵遲
既無稽古之勤止望易農之仕安敢苟求進達濫買名
聲但任顛愚獲逢濟哲聯叨服冕遽至秉鈞而莫貢昌
言多隳庶績復致省方之難皆由失職之愆且合自拘
敢期策免陛下克固知臣之鑒每推責已之誠雖罷燹

調猶當節制捧彤弓而欲去尚抱憂心指金鉉以復留
終迴宸睠輔相之委近代所無不才何補於股肱有感
徒深於骨髓伏遇陛下勃興景祚丕變公朝掃蔽日之
浮雲納投水之堅石應機之急當宁不違從諫之明轉
圜未速仰觀奮發實在斯須聖政惟新墜章咸舉宜求
耆碩共致承平今臣曲被睿慈仍加霈澤黃樞正秩青
史專脩兼司運漕之權俾集牢籠之利屏躬承命俛首
退思固合避賢唯憂致寇保其終始賜以安全陛下且

許乞骸不令覆餗徇公為理擇善任人幸非伯石

一作安石

非之情敢待名平之說且移盛寵別授通材顧叶澄清

仍資庶富而近臣遽降

一作近
遽辭免

聖旨重臨難陳固讓之

辭唯勵恪居之志雖多言可畏垂甦續而有所不聞而
內省堪憂補玄袞而何能自効臣某無任荷恩榮耀兢
戴怔忡之至

文苑英華卷五百八十二